

## A NEGRA TERRA

De falar, falarei coa terra.

A terra verdadeira,

a negra terra

onde prende a raíz.

A terra que se pisa.

A terra que se queima e que se crava.

Ese enorme lenzo onde o home debuxa o seu capricho.

Onde o home se perde e se revolve en sombras.

A negra terra,

ese corpo de puta vella con dentes amarelos de tabaco,

con olleiras negras de tan azuis.

De falar, só con ela falarei

e falarei coas mans,

docemente coas unllas,

coa paixón dun amante,

como falan, cando albiscan a morte, os xabarís feridos.

De falar, falarei coa terra.

Coa terra, con esa negra terra

que cospe, como sangue do peito, primaveras.